


## Zatvor i Sudnji Dan

06/2016

Uz pomoć ovog dijagrama kojeg sam posudio iz – [ovog izvora](#), zajedno sa definicijama, pokušaćemo sagledati situaciju na terenu (matriksu/kokošinjcu).



(Ovo na prvi pogled može izgledati komplikovano ali ne trebamo se plašiti jer se stvar može i pojednostaviti.)

Znači, radilo bi se o prikazu 9 komponenti „zatvorskog kompleksa“ ili „svijeta-matriksa“ (“kokošinjca”) u kojem vlada iluzija i prevara... gdje smo se zadesili... kroz koji kružimo, ko zna od kad i... ko zna do kad i... odakle nam se valja izvlačiti ili mijenjati situaciju na terenu.

Istinsko ja (nazvano u navedenom izvoru: „Sovereign Integral“ ili „Suvereni Integral“) bila bi jedna destilacija Prvog Izvora u singularnoj, ljudskoj manifestaciji ili izrazu; Istinsko ja raspolaže istinskom svijesti Izvora (ovdje „Izvor“ nema nikakve veze s onim što mi kao ličnosti-strane instalacije-lažna ja-mašine... podrazumijevamo pod „bogom“). Prvi izvor se može označiti i kao jedan kolektiv ljudskih bića neometan od strane HMS-a (ispod opisano). Prvi izvor se podijelio na individualne jedinice u obliku nas, a neki od nas su se u međuvremenu ovdje zaglavili, odnosno, postali zarobljenici, nekih drugih entiteta, čija priroda nije ljudska.

1. HMS (Human Mind System) ili Sistem ljudskog uma, sastojao bi se od tri funkcionalna mehanizma; nesusvjesnog uma, podsvijesti i svjesnog uma; te tri komponente bi zajedno činile ono što mi nazivamo – svijest. Ta svijest je lažna; ona je vještačka, kompjuterski program, ona nije naša; njen predstavnik je “naša” – ličnost-mašina-strana instalacija-implant...; svako od nas se neposredno prije

rođenja implantira tom instalacijom koju nazivamo – ličnost; ona je programljiva i posao joj je da nas drži u lažnoj realnosti, poistovijećene s njom... tako da je ona... “sve što znamo o sebi”.

2. MPG-Money Power Grid ili Finasijski sistem moći – (samo ime kaže); tu spada tzv. “elita” koja kontroliše ovu realnost odavdje; oni su takođe pripadnici zatvora ali imaju beneficije zato što aktivno učestvuju u kontroli i manipulaciji zatvorenika; (zatvorenik je ljudsko biće koje ima u sebi Istinsko ja ali mu je nakalemljena „mašina“ u obliku ličnosti u sklopu HMS-a, koja bi bila nešto kao „prvi ili neposredni čuvar“, čiji je posao da spriječi povezivanje njenog domaćina s Istinskom svijesti, preko njegovog Istinskog ja, pa tako i njegovo oslobađanje iz lažne reanosti. Tako, kao oni „podrumaši“ iz Kusturicinog filma Podzemlje, rađamo se i umiremo u podrumu, nesvjesni da postoje i druge realnosti, pored ove podrumske koju jedino znamo.

Elita, uglavnom sastavljena od antropoida, bila bi nešto kao pripadnici onih „sonderkommando“ jedinica sastavljenih od Jevreja u nacističkim koncentracionim logorima za vrijeme Drugog svjetskog rata, čiji je posao bio da izvode najprljavije poslove nad logorašima koje su većinom činili takođe Jevreji a za te usluge dobijali su od Nacista određene beneficije, što im je omogućavalo jedan lagodniji život u logoru). Tako, novac im obezbjeđuje moć u ovom kokošinjcu-logoru-zatvoru- farmi-lažnoj realnosti kao i upravne pozicije, odnosno, kontrolu nad svim segmentima ljudskog društva.

3. IUS – Interdimensional Universe Structure ili Interdimenzionalna struktura univerzuma; tu bi spadali razni realiteti u okviru kokošinjca-matrixa (uključujući tzv. astralne zone; gdje je moguće i „astralno odletjeti“ ili se projicirati, odnosno, obići i te zone matriksa-lažne realnosti... i osmotriti ih uz pomoć instalacije-ličnosti... međutim, to nema nikakve veze sa izlaskom iz matrixa-kokošinjca, niti s nekom istinskom percepcijom. Po matrix-u se može astralno letjeti ali se ne može iz njega... izletjeti.

4. GSSC – God Spirit Soul Complex; ovdje spadaju razni programi koji nam se nude u obliku religija i duhovnosti gdje bi religija i duhovnost predstavljali dvije „različite“ strane istog novčića; ukratko, ovi programi su dizajnirani za svrhu našeg brčkanja u njima... do... daljnjeg... bez postizanja ičega konkretnog u smislu oslobađanja našeg bića... mada se može reći da nekima od nas može doći iz dupeta u glavu, u smislu, da u toku brčkanja, neki napokon shvate da se brčkaju u lažima... pa onda da počnu tražiti... Istinu... U sklopu GSSC programa, odnosno, kao proizvođači HMS-a, nalazile bi se i neke „duhovne“ komponente koje mi kao mašine percipiramo u obliku duše i duha. Znači, u lažnoj realnosti imali bi i lažnu dušu i lažni duh?!

(U istočnoj gnostici, ono što mi percipiramo kao “duša”, bio bi u stvari samo jedan lažni izraz ličnosti-lažnog ja:

*„Osim rijetkih slučajeva, čovjek ne zna ni o čemu drugom unutar sebe samog, osim svoje Ličnosti. Ona mu se, u odnosu na njegovo tijelo, često predstavlja njegovom dušom. Međutim, zbog svog neprijateljskog stava prema istinskom ‘Ja’, Ličnost je mnogo čvršće vezana za tijelo, nego za njega. Taj kompleks duše-Ličnosti je kao takav nestalan i osuđen je na propast.*

(...)

*U stvari, postoji samo jedan način za spasenje ove ovakve duše-Ličnosti, a to je stvaranje njene čvrste veze sa istinskom, vječnom i neuništivom Dušom, preko medijuma kojeg čine tzv. viši centri svijesti“.(...) [Izvor]*

...odakle se implicira da postoji Stvarna Duša, koja se može dosegnuti preko "viših centara svijesti" koje za razliku od donjeg intelektualnog, motornog i emocionalnog centra kojima raspolaže naše lažno-ja/ličnost, podrazumijevaju - gornji intelektualni, emocionalni i seksualni centar, čiji integral bi podrazumijevao – Istinsko ja. Znači, u ovoj realnosti, bilo čime da baratamo, bilo bi – lažno.

Kad bi se povezali s Istinskim ja i dosegli Istinsku svijest, mi bi napustili ovu „sivu zonu“ ili bi je ofarbali u neku drugu boju, odnosno, promijenili ju iz lažne u istinsku. Tako bi i otpalo odavdje i od nas... sve ono što je... lažno. Samo povezivanje s Istinskim Ja, predstavljalo bi jedan proces prelaska iz... lažnog... u... istinsko. Naravno, sve dok smo poistovjeđeni s lažnim dijelom sebe, sve laži koje su nam prezentirane u lažnoj realnosti, doživljavaćemo istinitim, što za neke od nas može potrazumijevati i dosta patnje... pa se tako možemo patiti sve dok ne dođemo sebi.

Ovaj program u svom sklopu sadrži i podprograme koji su nam poznati kao satori, nirvane, prosvjetljenja itd. i koji su dizajnirani kao neke „naprednije duhovne zone“ koje duhovnjaci kao trebaju da dosegnu kad se dovoljno duhovno razvijaju... u sklopu... cijele prevare. Dakle, to bi bile samo još neke... od... bezbroj... zamki.

5. DSIND; - Ovo bi bilo nešto kao dodatni program u sklopu HMS-a koji nas navodi da se bojimo budućnosti i smrti a takođe bi mogao da ima i neke veze sa Štokholmskim sindromom.

6. PS – Polarity System; Sistem polariteta - ovo bi nam trebalo biti već poznato u smislu našeg doživljavanja i prosuđivanja svega u crno-bijeloj tehnici; naša egzistencija u sklopu HMS-a, istovremeno podrazumijeva i egzistenciju u dualizmu; ovdje slijedi izvod iz teksta Bitka za dušu:

*Radi se o jednom "glupom" vicu kojeg sam čuo kad sam još bio dijete. Čuo sam i zaboravio mnogo viceva u životu a vjerovatno ima razloga zašto sam ovog zapamtio?! U svakom slučaju, on predstavlja naš binarni način razmišljanja a ide kao priča o bitci između "sila zla" i "sila dobra". U vrijeme kad sam čuo taj vic, partizani su bili smatrani oličenjem dobra a Švabe, oličenjem zla. Tako je bila jedna šuma koja se nalazila na strateški važnom mjestu. Šumu su prvo zauzeli partizani, međutim, Švabe su izvršile napad, razvila se žestoka bitka uz puno vatre i dima... Švabama pođe za rukom da istjeraju partizane iz šume, međutim, partizani se prestroje, pa izvrše kontra-napad i istjeraju Švabe iz šume... ovi se naravno nisu mogli pomiriti sa gubitkom strateški važne pozicije, tako da izvrše napad na partizane i istjeraju ih iz šume... i tako cijeli dan, partizani u šumu, Švabe iz šume, Švabe u šumu, partizani iz šume, partizani u šumu... (ovdje pripovjedač zastane i onako sjetno se zamisli nad cijelom situacijom)..., naravno, ne prođe dugo kad neki od slušaoca nestrpljivo zapita: „Pa, reci šta je bilo na kraju, ko je pobjedio“!?! ... a ovaj, onako sjetno odgovori: "Ma, ništa, došo šumar i sviju ih rastjero".*

*...onda obično slijedi uzdah od strane slušaoca: „E, đe je našo da naiđe baš kad je bilo najdramatičnije!?“*

*...pa onda pitanja:*

*„Ko je sad šumar!? Je li je on dobar ili loš, pravedan ili nepravedan, koga on voli a koga ne voli...?! Mogao bi biti dobar jer je istjerao Švabe a opet, ako je dobar, zašto je onda istjerao i partizane za koje svi znamo da su – dobri“.*

*Dakle, ovdje imamo naglu pojavu treće stranke između „pozitivne“ i „negativne,“ koja ima razum/razumijevanje, koja je zaustavila psiho-patološke aktivnosti upražnjavane od strane obe zaraćene strane, zavela red, uspostavila mir i ravnotežu u životnoj sredini, spriječila daljnje uništavanje života i prirode... Treća sila?!*

*(Naravno, ne moramo ni pominjati to da su partizani u međuvremenu izgubili status pozitivne sile u nekim dijelovima Balkana, dok su ga zadobile Švabe, što nam govori koliko su „pozitivno“- „negativno“ ili „crno-bijelo“ isparljive, zamjenljive, odnosno - nestabilne vrijednosti, te kao takve često nemaju veze sa objektivnom realnošću.)*

*S aspekta binarne svijesti ličnosti, ova sila, koja se u gnosticima naziva “treća sila” ili “neutralizirajuća sila” je skoro nevidljiva i teško objašnjiva jer često ovisi i od konteksta određene situacije. Tako, mi smo u ovoj realnosti uveliko kontrolisani kroz taj dualizam, ne bivajući u stanju da vidimo treću opciju između dvije koje su nam ponuđene i od kojih su obe obično pogrešne. (Jedan od primjera bi bili izbori gdje se od nas na kraju traži da biramo između dvije osobe, obično psihopate, koje u suštini predstavljaju isto sranje u različitim pakovanjima. Drugi primjer bi bili ratovi gdje na jednoj strani imamo ljudska bića programirana ovim ideologijama ili religijama a na drugoj, ljudska bića programirana onim ideologijama ili religijama itd.) Tako se obezbjeđuju uslovi za likvidaciju ljudskih bića od strane ljudskih bića u korist – treće strane.*

*S obzirom da naše ličnosti operišu u sklopu onog lažnog Sistema ljudske svijesti, njima bi ponašanje nekoga ko raspolaže Istinskom svijesti, kao što bi bio onaj “šumar”, bilo - nerazumljivo. Istinska svijest je objektivna svijest dok ova svijest koju mi smatramo nekom čistom ili budnom svijesti, lažna. To je svijest koja nas drži u stanju “sna” koji je gori od onog sna, noću u krevetu (kako je to ruski ezoteričar Gurđijev često govorio.)*

7. GMS – Genetički manipulativni sistem; podrazumijeva razne programe manipulacije našeg genoma kako bi se dobio naš „optimalan“ genom koji bi, naravno, više odgovarao manipulatorima, nego nama.

8. Wholeness Navigator – takođe još jedan od programa u sklopu HMS-a koji je dizajniran za navođenje ljudi u pravcu jedne iskonske potrage za bogom (kojeg će oni tražiti sve do... „bogoavljenja“...)

9. PDS – Post Death System; program dizajniran za doček i prihvatanje onih od nas koji su friško “odjavljeni” odavdje, kao i za njihovo daljnje programiranje. Dakle, kad pređemo na „drugu stranu“, zadržaćemo „astralno“ tijelo koje će donekle odgovarati onom fizičkom kojeg smo imali ali i stranu-instalaciju koja će opet poslužiti kao medijum za naše reprogramiranje i reciklažu. „Anđeli“, „uskrsnuti majstori“, „duhovi vodiči“ i ko zna ko, koji nas dočekuju s „druge strane“, takođe bi bili zatvorenici s tim što bi radili u sklopu one druge strane zatvora, gdje idemo kad se odavdje odjavimo. Oni nas tamo dočekaju uz 'vaku ili 'naku muziku i određene specijalne, svjestlosne efekte i naravno, uz puno “ljubavi”, te nam, nakon što malo odmorimo, skrenu pažnju na neke naše greške koje smo napravili u prošlom životu i neke stvari koje nismo baš najbolje naučili ili odradili a onda nas navedu da se vratimo „samo još jednom,“ kako bi pozavršavali nezavršene poslove, ubacujući nas opet u igru, čiji je tok i ishod kontrolisan?! Programirani kakvi jesmo, nismo u stanju ni tamo da se otriježnimo, da ih tamo prepoznamo kao takve, nabijemo ih nogom u dupe i kulturno im kažemo: „Odjebite od mene, mater vam jebem fašističku“! A i da jesmo nešto svjesniji, ni s one strane,

vjerovatno, ne bi uspjeli prepoznati zidove zatvora i izaći iz njega. (Ovaj zatvor može biti i veličine univerzuma ali takođe i mi možemo biti iste veličine ili veliki koliko god je to potrebno, kad dođemo sebi!? Dakle, „karta za izlazak“ ili uslov za promjenu stanja u ovoj realnosti, bilo bi jedino ono Istinsko Ja, odnosno, raspolaganje - Istinskom svijesti.

\*\*

Bez obzira na drugačiju terminologiju kojom se navedeni izvor služi, ukoliko se uzme u obzir osnovna konstrukcija, ovo bi mogao biti jedan prilično dobar opis ove multidimenzionalne virtuele pušione u kojoj smo pušili, pušimo i... valjda... nećemo još dugo, tj... kako ko?! Zidovi ovog zatvora za nas su nevidljivi a takođe i njegovim čuvarima, koji imaju beneficirana radna mjesta s kojim idu i prateći mentalni programi. Znači, s aspekta istinske svijesti, ovdje bi bilo SVE lažno, uključujući i nas, naravno, ovakve kakvi trenutno jesmo, kao i sve one naše „stavove“ koje bi mi, kao takvi... imali... prema svemu ovome ili... prema... bilo čemu drugom.

I tako, sve što znamo o sebi je naša... mašina-ličnost... a sve što znamo o onome izvan sebe je... zatvor ili jedna lažna realnost... koju mi vidimo kao istinitu... a da bi saznali istinu o sebi... morali bi isključiti mašinu... preuzeti kontrolu nad njom... povezati se s Istinskim Ja... koje će nam omogućiti doseganje... Istinske Svijesti... pa kad postanemo... istinski svjesni... onda ćemo znati i sve ono... što trebamo znati...

\*\*\*\*\*

Ovdje se postavlja pitanje, da li se jedno ovakvo stanje može uopšte prevazići?

Ako bi uzeli kao jedan radni model situacije u kojoj se nalazimo, onaj podrum iz Kusturicinog filma Podzemlje, i zamislimo da smo se mi rodili u tom podrumu u kojeg nas je zatvorio Drug Marko koji bi simbolično predstavljao lažnu svijest s maskom trezvenosti, onda bi za nas taj podrum u kojem smo se zadesili bio jedina realnost a zbivanja u podrumu bi interpretirali i racionalizovali u skladu s našom podrumaškom svijesti čiji bi predstvnik bila naša programirana ličnost koju bi mi smatrali sasvim normalnom jer ne bi znali šta je stvarno normalno.

Ličnost, kao programirana komponenta ljudskog bića ide zajedno sa realnošću u kojoj živimo. Tako, podrumska realnost bi bila jedna lažna realnost u kojoj žive ličnosti ili entiteti koji su takođe lažni a mi se poistovjećujemo s njima.

Da stvar bude komplikovanija, podrumska populacija je izmiješana u smislu "sastava" ljudskog bića:

*"U prvom volumenu Gnostike, već smo nekoliko puta pomenuli koegzistenciju dvije suštinski različite rase: jednu koja se sastoji od ljudi i drugu, od antropoida. Moramo naglasiti to da s ezoteričke tačke gledišta, ovaj drugi pojam nema podređeno značenje.*

(...)

*(...)ta dva čovječanstva su slična po izgledu ali nisu slična po suštini. Možemo čak reći i to da je cijela dramatična istorija čovječanstva, od Adamovog pada pa sve do danas, nadsjenjena koegzistencijom ove dvije ljudske rase, do čijeg će razdvajanja doći tek na Sudnji dan". (Izvod iz Gnosis III, B. Mouravieff, Poglavlje XIV)*

Dakle, u podrumu bi imali, uglavnom, dvije vrste ljudi. Jedni bi imali u sebi predstavnika istinske svijesti, Istinsko ja ili Istinsku Dušu, dok drugi ne bi imali tu komponentu.

Tako bi se moglo reći da postoje tri načina egzistencije:

Prvi način bi podrazumijevala jedna egzistencija čisto na bazi ličnosti, bez prisustva Istinskog ja (individue opisane kao antropoidi ili organski portali, gdje bi malo žešće slučajeve te vrste predstavljale one naše klasične psihopate.) Oni će da raspolažu s tzv. „budnom svijesti koja ljude drži u jednom snu koji je gori od onog sna, noću u krevetu“ (kako je to Gurđijev govorio). To je subjektivna svijest lažnog ja-ličnosti.

Drugi način egzistencije podrazumijevaju ljudi koji takođe egzistiraju usko povezani i identifikovani sa svojim Lažnim ja-ličnošću-stranom instalacijom-implantom-kočijašem-predatorovim umom-mašinom-trojanskim konjem... ali imaju u sebi i Istinsko Ja („gornje centre Duše“) s kojim imaju veoma slabu vezu. Oni će da raspolažu s tzv. „budnom svijesti koja ljude drži u jednom snu koji je gori od onog sna, noću u krevetu“ (kako je to Gurđijev govorio). To je subjektivna svijest lažnog ja-ličnosti.

Treći način egzistencije bio podrazumijevao ljude koji su razotkrili svoju ličnost-lažno ja-stranu instalaciju-mašinu-trojanskog konja-implant... kao takvu i koji su je uspjeli savladati i povezati se sa svojim Istinskim ja, te tako dosegli i 'Svijest Istinskog Ja'.

Kao što je ličnost predstavnik lažne svijesti koja se manifestuje u sklopu onog "Sistema ljudskog uma", tako je Istinsko Ja predstavnik istinske svijesti Prvog Izvora, odakle smo potekli a u međuvremenu postali zarobljeni ovdje.

Tako, u podrumu imamo antropoide koji predstavljaju "lažnjake", a takođe imamo i ljude koji u sebi imaju Istinsko ja, kojeg skoro da nisu svjesni jer su takođe poistovječeni s onim lažnim dijelom svog bića do te mjere da sve što znaju o sebi, to bi bio taj lažnjak ili njihova ličnost.

Tako, život u podrumu može da se odvija sve dok "Drug Marko" ne napravi kataklizmu dok, s druge strane, postoji i mogućnost da majmun (prirodna ili istinska svijest) "opali iz topa" i sruši zidove podruma. Ova druga opcija bi se nazivala Sudnji dan ili Poslednji sud kojeg je Moravjev pomenuo u gornjem navodu kao "dan" kad će doći do razdvajanja ljudi i antropoida, odnosno, kada će doći do razdvajanja istinskog i lažnog. Ko će ovdje biti "sudija" ako pod "sudijom" podrazumijevamo nekoga ko je nepristrasan, pošten i objektivan?! Sudija može biti samo ona Istinska Svijest koja našim ličnostima nije, niti može biti poznata jer one same po sebi, kao lažni dijelovi našeg bića, nisu u stanju da dožive ili razumiju nešto što je istinito. Dakle, do Sudnjeg Dana bi došlo u slučaju jednog prodora Istinske Svijesti u ovu lažnu realnost kojom operiše ili upravlja lažna ili vještačka svijest, uglavnom preko njenih "proxy-servera" tj. lažnih komponenti naših bića, što podrazumijeva naše – ličnosti, zajedno s njihovim imenima i prezimenima.

Znači, u slučaju prodora Istine u jednu oblast u kojoj dominira laž i kojom upravlja laž i u kojoj egzistiraju bića koja su se poistovjetila s tom laži, sve što je lažno, početi će da otpada odatle i formiraće se istinska realnost koju će moći naseliti samo ono što je... istinito. Istina će biti sudija. Naravno, kao nešto što je po svojoj suštini lažno, naše ličnosti neće biti nimalo oduševljene s ovim konceptom, što možete i sami primjetiti jer vi ovo čitate i tumačite uz pomoć "svoje" ličnosti. Vi, uz pomoć nečega što je lažno, pokušavate doći do istine a ono što je lažno, nije u stanju da vidi istinu,

kao takvu, nego uglavnom interpretira ono što percipira, na bazi: “*sviđa mi se*”-“*ne sviđa mi se*” (kako se jednoj ličnosti-laži uopšte može svidjeti jedna informacija koja nju otkriva kao takvu?! Nikako!?)

Dakle, sviđalo se to nama ili ne, ukoliko bi se postigao određeni prag ili tzv. “kritična tačka”... Istinske Svijesti u ovoj realnosti, što bi se desilo ukoliko bi broj individua iz one treće grupe bio dovoljan za tako nešto (istinska svijest bi se ovdje manifestovala preko njih), onda će doći do formiranja jedne nove realnosti čije stanovnike neće moći podrazumijevati ništa što je lažno, pa tako ni naše... ličnosti. Tako, oni od nas, koji imaju u sebi ono Istinsko ja, dobiće mogućnost da se presele u novu realnost, s tim što će prethodno morati da izduvaju svoju ličnost i stave ju pod kontrolu od strane onog istinskog dijela njihovog bića. Samo taj istinski dio bića može da prevede nekoga preko mosta, iz jedne lažne egzistencije ili realnosti u - istinsku realnost. Tako, oni koji budu u stanju da prepoznaju ovu dinamiku na nivou bića (ako ne u ovom momentu, onda možda nešto kasnije!?), te tako budu u stanju da vide svoju ličnost kao jedan lažni dio sebe, te ga izduvaju i stave u džep a onda povremeno vade iz džepa čisto za svrhu interakcije s drugima... neće imati problema ukoliko dođe do Sudnjeg Dana a možda će tako pospiješiti i njegovo svanjanje u ovoj realnosti. (Oni će kasnije shvatiti i to da nisu nikad ni bili ta ličnost i da su oni bili ti koji su se odavno reinkarnirali u ovoj realnosti a ne ta ličnost koja im je sada u džepu i s kojom su se sve do sada poistovjećivali u ovom životu.)

[Ovdje jedna mala digresija. U stvari, u slučaju istinitosti ovih informacija, samim čitanjem ovog teksta, već ste napravili jedno dobro djelo. Ubrzali ste svitanje “sudnjeg dana”, odnosno, održavanje “posljednjeg suda” jer ste automatski preneli ove informacije na nivo onoga što je C.G. Jung zvao - “kolektivno nesvjesno”, odnosno, nivo lažne svijesti koju svi dijelimo i koja nam diktira razmišljanje i ponašanje. S obzirom da istina djeluje u odnosu na laži kao penicilin, na tom nivou, unošenjem istinskih informacija tamo, istovremeno doprinosimo i postizanju one kritične tačke Istinske Svijesti koja će biti potrebna za izazivanje svitanja “sudnjeg dana”.]

Onaj istinski dio bića s kojim će se sada poistovjećivati oni od nas koji ga imaju (za razliku od prije, kad su se poistovjećivali s onim svojim lažnim dijelom), “govoriće” im (u obliku jednog unutrašnjeg znanja) šta da rade u svakom momentu u kojem jesu (a ne u budućnosti koja ne postoji). U slučaju bilo kakve pojave straha ili panike, to bi značilo da je ličnost iskočila iz džepa i počela se opet naduvavati, te tako, po svom običaju i – mahnitati; naravno, tu se čovjek ne treba zbunjivati. Bitno je da sada znamo da je stvar čisto mehaničke prirode. U takvim slučajevima, ličnost trebamo samo klepiti po ušima, ponovo je izduvati i vratiti u džep. Nakon što nas par puta pokušaju zaskočiti, nakon tih nekoliko neuspješnih pokušaja preuzimanja volana, dosta ličnosti će napokon shvatiti to da samo u džepu Istinskih ja, mogu biti spašene sigurne smrti, prelaskom iz podrumске realnosti u istinsku, koja će im obezbijediti besmrtnost.

I na kraju, želim vam što više... Istinske Svjesnosti!

\*\*\*\*\*

Par članaka koji mogu biti od pomoći kod razumijevanja ove tematike:

[Kontejneri i oslobađanje ljudskog bića, Iz praktične gnostike i Zatvorski čuvari](#)